

河源紀略

傅增湘題

欽定河源紀畧卷三十二

雜錄

臣等謹案禹貢紀上田貢篚白埴壤壚墳以至繇
喬皮卉璆鐵琳琅之屬靡不備載職方氏敘九州
山川藪澤利民畜穀所列方物尤詳故列史志地
理者國邑都會之外必旁及于土風物產遺文故
蹟志乘家採摘該博其有瑣文碎事勿入專門則
綴爲雜錄以總萃之良以資考鏡辨得失細大不
遺斯足尙也大河正源潛發於蔥嶺和闐匯南北
兩山及東境諸水伏羅布淖爾重發阿勒坦噶達

素齊老之上流爲阿勒坦郭勒綿地廣邈事蹟夥
繁前代未列版圖徵引之家易滋舛錯恭逢

聖朝德威廣被西域底平寸土尺壤悉歸疆理於是亘
古以來伯翳所紀博望所窮漢唐之世經營羈置
弗能盡有者皆可恭奉

皇朝輿圖以明指其土地水泉燥濕寒暑之故並其舊
聞遺跡之所在與大河靈源宛轉映發而沕昧之
宇莫不耀于光明茲謹旁採列史百家蔥嶺以下
貴德以上諸境軼事分條搜輯匯爲四卷諸子裨
官所言往往失實隨事加案亦足以訂正其是非

焉昔人每病西陲土物荒遠難稽良由局於輿地
囿於見聞耳幸得遊

聖世而彙前聞鉤稽考索言皆有物事必合方濛汜之
區初不異禹甸周疆之星陳而日麗也猗歟盛已

欽定河源紀畧卷三十二

雜錄一

蔥嶺河源喀什噶爾葉爾羌境

漢書莎車有鐵山出青玉

又西夜國北與莎車接隨畜逐水草往來土地出

玉石

又難兜有銀銅鐵

後漢書西夜生白草

又耿恭于城

疏勒城

中穿井十五丈不得水吏士渴

乏恭仰歎曰聞昔貳師將軍拔佩刀刺山飛泉湧

出今漢德神明豈有窮哉乃向井再拜爲吏士禱
有頃水泉奔出

按漢書疏勒爲今喀什噶爾莎車爲今葉爾羌
至西夜蒲犁皮山無雷依附難堯則與二國附
近在蔥嶺山中皆有河源綿亘故以次類附焉
其烏秣婁賓烏弋山離諸國皆在蔥嶺西不備
錄後漢書所載耿恭拜井事亦見於水經注撫
錄於此足爲喀什噶爾故實之始云

晉法顯佛國記竭父國當蔥嶺中自蔥嶺已前草
木果實皆異惟竹及安石榴甘蔗三物與漢地同

耳從此西行向北天竺在道一月得度蔥嶺蔥嶺
冬夏有雪

水經注廣志曰休循國居蔥嶺其山多大蔥

魏書西域傳鉢和國在渴盤陀西其土尤寒有大
雪山望若銀峯

又朱居國在于闐西其人山居

又渴盤陀國在蔥嶺東朱駒波西河經其東北有
高山夏積霜雪

又波知國在鉢和西南土狹人貧依託山谷

北史西域傳鉢和國服氍毹裘

又疏勒王戴金獅子冠

又疏勒多銅鐵錫雄黃土多稻粟菽麥

又疏勒國遣使送釋迦牟尼佛袈裟一長二丈餘
帝以審是佛衣應有靈異遂燒之以驗虛實置於
猛火之上經日不燃人手足皆六指產子非六指
者皆不育

按北史所傳佛衣長二丈餘經火不燃其說疑
出附會產子六指尤非恒理疏勒爲今喀什噶
爾未聞其地奉佛亦並無六指之異以今証古
知北史之未爲實錄也

又朱居國有麥多林果

又賒彌國不信佛法專事諸神

唐辯機西域記蔥嶺者據瞻部洲中崖嶺數百重
幽谷險峻恒積冰雪寒風勁烈地多出蔥故謂蔥
嶺又以山崖蔥翠遂以名焉

又波謎羅川中有大龍池東西三百餘里南北五
十餘里據大蔥嶺內當瞻部洲中其地最高水乃
澄清皎鏡莫測其深色帶青黑味甚甘美潛居則
鰈鰒魚龍鼃鼃龜鼈浮游乃鴛鴦鴻雁鴛鵝鸕鶿
諸鳥大卵遺殼荒野或草澤間或沙渚上池西派

一大流西至達摩悉鐵帝國東界與縛芻河合而
西流故此以右水皆西流池東派一大流與徙多
河合而東流波謎羅川南越有鉢露羅國多金銀
金色如火

又跋祿迦國土宜氣序人性風俗文字法則同屈
支國語言少異細氈細毼鄰國所重

又素葉水城城周六七里諸國商胡雜居焉土宜
麻麥蒲萄林樹稀疏氣序風寒人衣氈毼素葉已
西數十里城皆立長

又弗力恃薩儻那國東北踰山涉川越迦畢試國

邊城小邑凡數十所至大雪山嬰羅犀那大嶺嶺
極崇峻危陞敝傾蹊徑槃迂巖岫回互或入深谷
或上高崖盛夏含凍鑿冰而度行經三日方至嶺
上寒風淒烈積雪彌谷行旅經涉莫能佇足飛隼
翔翔不能越度足趾步履然後翻飛下望諸山若
觀培塿瞻部洲中斯嶺特高其巔無樹惟多石峯
攢立叢倚森然若林

按西域記所載諸山川皆唐僧元奘得諸親歷
嬰羅犀那大嶺實蔥嶺極西處也形勢險峻足
資考證備載其說以見蔥嶺之高大焉

又烏鎡國周千餘里國大都城周十餘里南臨徙
多河地土沃壤稼穡殷盛林木鬱茂華果俱繁多
出雜玉白玉黼玉

又佉沙國多沙磧少壤土稼穡殷盛華果繁茂出
細氊毳

又斫句迦國周千餘里國大都城周十餘里堅峻
險固編戶殷盛山阜連屬礫石彌漫臨帶兩山頗
以耕植葡萄梨柰其果實繁

唐書西域傳蔥嶺俗名極疑山環竭盤陀國

又由疏勒西南入劍末谷不忍嶺六百里西北判

汗國治蔥嶺中都城負徒多河其王本疏勒人世
相承爲之西南卽頭痛山

按徙多河卽今大河之別名西域記作徙多唐
書則作徒多蓋字畫傳寫之誤今考西域記注
有云舊作私陀河私徙音相近當以西域記爲
正

又護密者元魏所謂鉢和橫一千六百里縱狹纔
四五里北臨烏澣河地寒冱堆阜曲折沙石流漫
又疏勒俗事祆神

宋馬端臨文獻通考渴盤陀朱俱波語言與于闐

相似其間多有異者

又疏勒國樂有豎箏篪琵琶五絃橫笛簫觱篥答
臘鼓腰鼓提鼓雞鼓十種爲一部二十二人隋唐
以備燕樂工人皂絲布白頭巾袍錦褕白絲布褲
舞人白襖錦袖赤皮鞞赤皮帶曲調有昔昔鹽一
臺鹽之類

欽定西域圖志云回人尊敬天神每歲設禮拜寺始生
教主曰派噶木巴爾每日對之誦經五次初次寅
時二次未時三次申時四次酉時五次戌時拜畢
則宣讚其義每七日赴禮拜寺誦經一次務集四

人合誦不論貴賤貧富皆然回人誦經典者曰阿
渾誦經以禳災迎福每遇大小年阿渾誦阿伊特
瑪納斯經爲衆祈祐衆人醵贈衣帽一襲遇青草
當生時有畜牧之家每十羊出一牽三十牛出一
頭送阿渾爲敬天禮阿渾牲畜蕃滋有羸餘牛羊
卽以之濟貧乏不自私也派噶木巴爾立祠堂奉
香火名曰瑪咱爾每年兩次衆人赴瑪咱爾禮拜
誦經張燈於樹通宵不寐瑪咱爾有香火田畝以
供祭祀之需回部西有默克默德納爲回之祖國
回人凡終身必親往禮拜以答鴻庥辦裝糧往還

期以三年惟富者能酬願貧無力者不能也亦有
附香火之資於富室以偕往者又山南諸回部有
城郭宮室故居處有恒有溝塍隴畝故田作有時
男識耕耘女知紡績漢書言自且末以東皆種五
穀是也耕織之外多善商賈自西土以及傍近諸
國無不至回俗以豕性昏形穢忌不食喜從高放
鵲鵲其人謂之鵲師赤云

又回俗以教主初生之年爲元年閱一歲則加一
年刻年數於汗之印上以爲識每三百六十日爲
一年不增減故每四年而餘二十一日四十年而